

百年之間有聖人而出者其師之謂乎且喜我先師
之法道至此時而勃興也前所謂傳衣付法之起于
此也余記其所聞之萬乙故詳其語以告後進雖至
久遠不問而可知其人也于時永德二年壬戌十二
月二十八日鼓山大隨欽記

石清水不斷念佛緣起 大藏卿匡房卿

佛法東漸以降依釋尊之遺教慕弥陀之淨刹者寔
繁有徒矣夫上官太子南岳之後身也初弘佛法於
東土故日域之人偏歸天台之教智者大師靈山之
聽衆也偏積觀念於西方故台嶺之衆悉仰極樂機
緣所感知有故矣常行三昧者四種三昧之一也慈
覺大師傳自唐土於我山矣常行堂置十四僧侶八
月中修七箇日不斷念佛至貞觀中山上諸院各修
此三昧已及二百餘年結緣不知幾千万人就中西
塔院常行堂結衆殊擇知德所補也雖金紫銀黃之

餘畜法龍義虎之禪侶不為此結衆之者緇徒所耻也其來有漸非昨日矣伏惟八幡大菩薩昔是万乘之君今又百王之祖也一天之下戴其德輝四海之中霑其息澤於戲本覺理性之月誠雖照蓮臺於佛位和光同塵之日猶垂叢祠於神道故祠官之徒造善業者少造惡業者多社邊之人管現世者繁營後世者稀弟子別當法印大和尚位清成相議曰弟子受生於此地寄身於我山少日入堂僧之列已經一紀長年應化之選亦向卅載移念佛於寶前導昏德於淨刹尤得此便宜矣和尚隨喜屢以勸誘然猶

心與事違年不我與未傳彼風儀和尚已墜其露命啞臍不及遺恨而已方今時已到矣緣亦熟焉治曆三年十月十三日敬屈西塔院結衆十二口三箇日夜於室前令修此三昧道儀照地紅葉落而隱映法音沸天秋風混而蕭颯以驚神聽以壯廟觀抑自明年以後須擇此地之禪侶以教此法之度曲以為年事不敢失隨仰願大菩薩哀愍證成南山雖騫東海雖變留此三昧于万葉以援紅塵之倍以利黑業之徒見聞觸知之人悉到西方結緣隨喜之輩悉證上品乃至沙界親踈鐵圍大小併出我人相之家悉證

究竟即之位敬白

延久二年十月日 左少弁大江朝臣匡房

[Faint bleed-through text from the reverse side of the page]

賀茂社櫻會緣起

掃部頭佐國

朝家鎮守皇大明神天降坐以還年紀久累不知幾百廻矣上自一人三公下至百僚衆庶戴其神德保此景福然則萬乘之幸臨經代々以儀式彌嚴博陸之參詣逐年々以祇敬無懈乃至都鄙貴賤道俗男女莫不欽仰矣是以前神主賀茂縣主成助相迎三春之令節開演八軸之法華隨喜之輩號之櫻會其期無定期在二月三月之芳辰其日無定日待紅櫻朱櫻之盛綻薰修黎及于數十年彼身々矣其人雖令期會長留縁為佛事也殊勝神壇之嚴饒也於是